

關里文獻考

闕里文獻考卷六十八

從祀賢儒第十四之二十六

明

薛瑄字德溫山西河津人祖仲義元末不仕以經術教授鄉里父貞洪武初領鄉薦爲元氏教諭母齊夢一紫衣人謁見而生瑄初生時肌膚瑩如水晶五藏皆露家人以爲怪欲不舉祖聞其啼聲洪大命止之少卽穎敏甫就塾授之詩書輒成誦日記千百言及貞改任滎陽瑄侍行時年十二以所作詩賦呈監司監司奇之欲以奇童薦固辭旣而聞高密魏希文海寧范汝舟深於理學貞乃並禮爲瑄師由是盡焚所作詩賦究心洛閩淵源至忘寢食後貞改官鄆陵瑄補鄆陵學生遂舉河南鄉試第一時永樂十有八年也明年成進士以省親歸居父喪悉遵古禮宣德中服除擢御史三楊當國欲邀一識面謝曰某忝糾劾之任無相識之理尋於班行中識之歎曰薛公見且

不可况得而屈乎出監湖廣銀場日探性理諸書學益進以繼母憂歸正統初還朝尙書郭璉舉爲山東提學僉事首揭白鹿洞學規開示學者俾先致知而後力行居敬以窮理由經以求道延見諸生必先詢其學行而後及於文藝親爲講授隨所長而成就之才者樂其寬而不才者憚其嚴皆呼爲薛夫子中官王振權傾一時語三楊吾鄉誰可爲京卿者以瑄對召爲大理左少卿三楊以用瑄出振意欲瑄一往見李賢語之瑄正色曰拜爵公朝謝恩私室吾不爲也其後議事東閣公卿見振多趨拜瑄獨屹立振趨揖之瑄亦無加禮自是銜瑄指揮某死妾有色振從子山欲納之指揮妻不肯妾遂訐妻毒殺天下都察院訊已誣服瑄及同官辨其冤三卻之都御史王文承振旨誣瑄等故出人罪振復諷言官劾瑄等受賄並下獄論瑄死時學士劉球上章忤振下錦衣衛死人皆爲瑄危瑄怡然曰生死命也手持周易誦讀不輟通政使李錫聞之曰真鐵漢也廷訊時瑄呼王

文曰若安能問我若爲御史長自當避文怒奏囚不聽理詔立決瑄有三子上書願一子代死二子充軍不允及當行刑振蒼頭忽泣於爨下振問故泣益悲曰聞今日薛夫子將刑也振大感動會刑科三覆奏兵部侍郎王偉亦申救乃放爲民家居七年閉門不出弟子來學者日衆景帝嗣位用給事中程信薦起大理寺丞也先入犯分守北門有功尋出督貴州軍餉事竣卽乞休學士江淵奏畱之景泰二年擢南京大理寺卿富豪殺人獄久不決瑄執寘之法是年冬御史劉孜薦瑄粹學飭躬進無所求退無所累實君子之儒不宜置之閒地乞召供館閣之職俾講學輔導必有裨益帝曰內閣本朕簡任非人所得薦不許後太監金英奉使道南京公卿俱餞於江上瑄獨不往英至京言於衆曰南京好官惟薛卿耳復言於帝四年秋召改北寺蘇州大饑貧民掠富豪粟火其居陷海避罪王文以閣臣出視坐以判當死者二百餘人瑄力辨其誣文恚曰此老倔強猶昔然卒得

減死屢疏告老不許英宗復辟拜禮部右侍郎兼翰林院學士入閣預機務王文于謙下獄下羣臣議石亨等將寘之極刑瑄力言於帝後二日文謙死獲減一等帝數見瑄所陳皆關君德事左右目之曰此真薛夫子也時曹吉祥用事其生日同列約往賀瑄遽稱腹痛而出尋命爲會試考官瑄爲首序以正學復性爲言或請易之瑄曰某平生所學惟此數字而已帝初禮遇甚厚後寢衰遂乞骸骨歸石亨素敬瑄聞其欲去來視疾且曰如卽不留當請之上下勅書卽家塾立教且以資其養何如瑄曰昔魯齋去元世祖賜勅書以教人先生懸於梁終身不以示人及卒發而視之乃勅書也某若資其養曷若不辭官之愈也亨歎息而去未幾徐有貞李賢皆下錦衣衛獄人始服瑄之去爲先見云家居時當李賢柄國屢致書問瑄終不答人問之曰昔溫公退居於洛呂申公當國屢以書問起居溫公不答某亦此意也瑄學一本程朱其修己教人以復性爲主充養邃密言動咸

可法嘗曰自考亭以還斯道已大明無煩著作直須躬行耳有讀書錄二十卷平易簡切皆自言其所得學者宗之稱爲敬軒先生天順八年六月卒年七十六贈禮部尙書諡文清弘治中詔祀於鄉給事中楊廉請頒讀書錄於國學俾六館誦習且請祠名詔名正學述曰文清在內閣時所與帝言皆正心誠意之學一以啓沃君心爲務一日召對便殿望見帝褻服以待卽疑立不入帝遽更之始入後連日不召見謂同列曰醴酒不設王之意怠矣曷去諸遂稱疾辭位蓋在閣中才五月耳夫子謂以道事君不可則止若文清者可謂得大臣之體者矣

闕里文獻考卷六十九

從祀賢儒第十四之二十七

明

陳獻章字公甫廣東新會人儀幹修偉右頰有七黑子母年二十四守節獻章事之至孝每出母有念輒心動卽歸舉正統十二年鄉試再上禮部不第從吳與弼講學居半載歸讀書窮日夜不輟築陽春臺靜坐其中數年無戶外跡久之復遊太學祭酒邢讓試和楊時此日不再得詩一篇驚曰龜山不如也颺言於朝以爲真儒復出由是名震京師給事中賀欽聽其議論卽日抗疏解官執弟子禮獻章旣歸四方來學者日進廣東布政使彭韶總督朱英交薦召至京令就試吏部屢辭疾不赴疏乞終養授翰林院檢討以歸至南安知府張弼疑其拜官與吳與弼不同對曰吳先生以布衣爲石亨所薦故不受職而求觀祕書冀在開悟主上耳時宰不悟先令受職然後觀書

殊戾先生意遂決去獻章聽選國子生何敢僞辭釣虛譽自是屢薦卒不起獻章之學以靜爲主其教學者但令端坐澄心於靜中養出端倪或勸之著述不答嘗自言曰吾年二十七始從吳聘君學於古聖賢之書無所不講然未知入處比歸白沙專求用力之方亦卒未有得於是舍繁求約靜坐久之然後見吾心之體隱然呈露日用應酬隨吾所欲如馬之有銜勒也其學灑然獨得論者謂有鳶飛魚躍之樂而蘭谿姜麟至以爲活孟子云弘治十三年卒年七十三萬歷初追諡文恭

蔡清字介夫福建晉江人少走侯官從林珙學易盡得其肯綮舉成化十三年鄉試第一二十年成進士卽乞假歸講學已謁選得禮部祠祭主事王恕長吏部重清調爲稽勲主事恆訪以時事清乃上二札一請振紀綱一薦劉大夏等三十餘人恕皆納用尋以母憂歸服闋復除祠祭員外郎乞便養改南京文選郎中一日心動急乞假養

父歸甫兩月而父卒自是家居授徒不出正德改元卽家起江西提學副使寧王宸濠驕恣遇朔望諸司先朝王次日謁文廟清不可先廟而後王王生辰令諸司以朝服賀清曰非禮也去蔽膝而入王積不悅會王求復護衛清有後言王欲誣以詆毀詔旨清遂乞休王佯輓畱且許以女妻其子竟力辭去劉瑾知天下議已用蔡京召楊時故事起清南京國子祭酒命甫下而清已卒時正德三年也年五十六清之學初主靜後主虛故以虛名齋平生飭躬砥行貧而樂施爲族黨依賴以善易名嘉靖八年其子推官存遠以所著易經四書蒙引進於朝詔爲刊布萬歷中追謚文莊贈禮部右侍郎

王守仁字伯安浙江餘姚人父華南京吏部尙書性孝華母岑年踰百歲卒華年已七十餘猶寢苦蔬食士論多之守仁娠十四月而生祖母夢神人自雲中途見下因名雲五歲不能言異人拊之更名守仁乃言年十五訪客居庸山海關時闕出塞縱觀山川形勝弱冠舉

鄉試學大進顧益好言兵且善射登弘治十二年進士使治前威寧伯王越葬還朝議方急西北邊守仁條八事上之尋授刑部主事決囚江北引疾歸起補兵部主事正德元年冬劉瑾逮南京給事中御史戴銑等二十餘人守仁抗章救瑾怒廷杖四十謫貴州龍場驛丞驛在萬山中苗獠雜處守仁因俗化導夷人喜相率伐木爲屋以棲之瑾誅量移廬陵知縣入覲遷南京刑部主事吏部尙書楊一清改之驗封屢遷考功郎中擢南京太僕少卿就遷鴻臚卿兵部尙書王瓊素奇守仁才十一年八月擢右僉都御史巡撫南贛當是時南中盜賊蜂起謝志山據橫水左溪桶岡池仲容據泃頭皆稱王與大庾陳曰能樂昌高快馬柳州龔福全等攻剽府縣而福建大帽山賊詹師富等又起前巡撫文森托疾避去志山合樂昌賊掠大庾攻南康贛州贛縣主簿吳玘戰死守仁至知左右多賊耳目乃呼老黠隸詰之隸戰栗不敢隱因貰其罪令訶賊賊動靜無勿知於是檄福建廣

東會兵先討大帽山賊明年正月督副使胡璉等破賊長富村逼之象湖山指揮覃桓縣丞紀鏞戰死守仁親率銳卒屯上杭佯退師出不意搗之連破四十餘寨俘斬七千有奇指揮王鎧等禽師富疏言權輕無以令將士請給旗牌提督軍務得便宜從事王瓊奏從其請乃更兵制二十五人爲伍伍有小甲二伍爲隊隊有總甲四甲爲哨哨有長協哨二佐之二哨爲營營有官參謀二佐之三營爲陣陣有偏將二陣爲軍軍有副將皆臨事委不命於朝副將以下得遽相罰治其年七月進兵大庾志山乘閒急攻南安知府李敷擊敗之副使楊章等亦生繫曰能以歸遂議討橫水左溪十月命都指揮許清贛州知府邢珣寧都知縣王天與各一軍會橫水敷及守備郊文汀州知府唐淳縣丞舒富各一軍會左溪吉安知府伍文定程鄉知縣張戢遏其奔軼守仁自駐南康去橫水三十里先遣四百人伏賊巢左右進軍逼之賊方迎戰兩山舉幟賊大驚謂官軍已盡殄其巢遂潰

乘勝克橫水志山及其黨蕭貴模等皆走桶岡左溪亦破守仁以桶岡險固移營近地諭以禍福賊首藍廷鳳等方震恐見使至大喜期仲冬朔降而珣文定已冒雨奪險入賊阻水陣珣直前搏戰文定與戢自右出賊倉卒敗走遇淳兵又敗諸軍破桶岡志山貴模廷鳳面縛降凡破巢八十有四俘斬六千有奇時湖廣巡撫秦金亦破福全其黨千人突至諸將禽斬之乃設崇義縣於橫水控諸徭還至贛州議討泃頭賊初守仁之平師富也龍川賊盧珂鄭志高陳英咸請降及征橫水泃頭賊將黃金巢亦以五百人降獨仲容未下橫水破仲容始遣弟仲安來歸而嚴爲戰守備詭言珂志高讐也將襲我故爲備守仁佯杖繫珂等而陰使珂弟集兵待遂下令散兵歲首大張燈樂仲容信且疑守仁賜以節物誘入謝仲容率九十三人營教場而自以數人入謁守仁呵之曰若皆吾民屯於外疑我乎悉引入祥符宮厚飲食之賊大喜過望益自安守仁畱仲容觀燈樂正月三日大

享伏甲士於門諸賊入以次悉禽戮之自將抵賊巢連破上中下三
剌斬賊二千有奇餘賊奔九連山山橫亘數百里陡絕不可攻乃簡
壯士七百人衣賊衣奔崖下賊招之上官軍進攻內外合擊禽斬無
遺乃於下剌立平和縣置戍而歸自是境內大定初朝議賊勢強發
廣東湖廣兵合勦守仁上疏止之不及桶岡旣滅湖廣兵始至及平
剌頭廣東尙未承檄守仁所將皆文吏及偏裨小校平數十年巨寇
遠近驚爲神進右副都御史予世襲錦衣衛百戶再進副千戶十四
年六月命勦福建叛軍行至豐城而寧王宸濠反知縣顧必以告守
仁急趨吉安與伍文定徵調兵食治器械舟楫傳檄暴宸濠罪俾守
令各率吏士勤王都御史王懋中編修鄒守益副使羅循羅欽德郎
中曾直御史張鼇山周魯評事羅僑同知郭祥鵬進士郭持平降謫
驛丞王思李中咸赴守仁軍御史謝源伍希儒自廣東還守仁留之
紀功因集衆議曰賊若出長江順流東下則南都不可保吾欲以計

撓之少遲旬日無患矣乃多遣閒謀檄府縣言都督許泰卻永將邊兵都督劉暉桂勇將京兵各四萬水陸並進南贛王守仁湖廣秦金兩廣楊旦各率所部合十六萬直擣南昌所至有司缺供者以軍法論又爲蠟書遺僞相李士實劉養正敍其歸國之誠令愆愆早發兵東下而縱謀洩之宸濠果疑與士實養正謀則皆勸之疾趨南京卽大位宸濠益大疑十餘日詎知中外兵不至乃悟守仁紿之七月壬辰朔留宜春王拱樛居守而劫其衆六萬人襲下九江南康出大江薄安慶守仁聞南昌兵少則大喜趨樟樹鎮知府臨江戴德孺袁州徐璉贛州邢珣都指揮余恩通判瑞州胡堯元童琦撫州鄒琥安吉談儲推官王暉徐文英知縣新淦李美泰和李楫萬安王冕寧都王天與各以兵來會合八萬人號三十萬或請救安慶守仁曰不然今九江南康已爲賊守我越南昌與相持江上二郡兵絕我後是腹背受敵也不如直搗南昌賊精銳悉出守備虛我軍新集氣銳攻必破

賊聞南昌破必解圍自救逆擊之湖中蔑不勝矣眾曰善己酉次豐城以文定爲前鋒先遣奉新知縣劉守緒襲其伏兵庚戌夜半文定兵抵廣潤門守兵駭散辛亥黎明諸軍梯垣登縛拱櫓等宮人多焚死軍士頗殺掠守仁戮犯令者十餘人有脅從安士民慰諭宗室人心乃悅居二日遣文定珣璉德孺各將精兵分道進而使堯元等設伏宸濠果自安慶還兵乙卯遇於黃家渡文定當其前鋒賊趨利珣璉繞出賊背貫其中文定恩乘之璉德孺張兩翼分賊勢堯元等伏發賊大潰退保八字腦宸濠懼盡發南康九江兵守仁遣知府撫州陳槐饒州林城取九江建昌曾與廣信周朝佐取南康丙辰復戰官軍卻守仁斬先卻者諸軍殊死戰賊復大敗退保樵舍聯舟爲方陣盡出金寶犒士明日宸濠方晨朝其羣臣官軍奄至以小舟載薪乘風縱火焚其副舟妃婁氏以下皆投水死宸濠舟膠淺倉卒易舟遁王冕所部兵追執之士實養正及降賊按察使楊樟皆就禽南康九江

亦下凡三十五日而賊平京師聞變諸大臣震懼王瓊大言曰王伯安居南昌上游必禽賊至是果奏捷武宗時已親征自稱威武大將軍率京邊驍卒數萬南下命安邊伯許泰爲副將軍偕提督軍務太監張忠平賊將軍左都督劉暉將京軍數千沂江而上抵南昌諸嬖倖故與宸濠通守仁初上宸濠反書因言覬覦者非特一寧王請黜奸諛以回天下豪傑心諸嬖倖皆恨宸濠旣平則相與媚功且懼守仁見帝發其罪競爲蜚語謂守仁先與通謀慮事不成乃起兵又欲令縱宸濠湖中待帝自禽守仁乘忠泰未至先俘宸濠發南昌忠泰以威武大將軍檄邀之廣信守仁不與閒道趨玉山上書請獻俘止帝南征帝不許至錢塘遇太監張永永提督贊畫機密軍務在忠泰輩上而故與楊一清善除劉瑾天下稱之守仁夜見永頌其賢因極言江西困敝不堪六師擾永深然之曰永此來爲調護聖躬非邀功也公大勲永知之但事不可直情耳守仁乃以宸濠付永而身至京

口欲朝行在聞巡撫江西命乃還南昌忠泰已先至恨失宸濠故縱京軍犯守仁或呼名慢罵守仁不爲動撫之愈厚病子藥死子棺遭喪於道必停車慰問良久始去京軍謂王都堂愛我無復犯者忠泰言寧府富厚甲天下今所蓄安在守仁曰宸濠異時盡以輸京師要人約內應籍可按也忠泰故嘗納宸濠賄者氣懾不敢復言己輕守仁文士強之射徐起三發三中京軍皆歡呼忠泰益沮會冬至守仁命居民巷祭已上冢哭時新喪亂悲號震野京軍離家久聞之無不泣下思歸者忠泰不得已班師比見帝與紀功給事中祝續御史章綸讒毀百端獨永時左右之忠泰揚言帝前曰守仁必反試召之必不至忠泰屢矯旨召守仁守仁得永密信不赴及是知出帝意立馳至忠泰計沮不令見帝守仁乃入九華山日宴坐僧寺帝覘知之曰王守仁學道人聞召卽至何謂反乃遣還鎮令更上捷音守仁乃易前奏言奉威武大將軍方略討平反亂而盡入諸嬖倖名江彬等乃

無言當是時讒邪構煽禍變叵測微守仁東南事幾殆世宗深知之甫卽位趣召入朝受封而大學士楊廷和與王瓊不相能守仁前後平賊率歸功瓊廷和不喜大臣亦多忌其功會有言國哀未畢不宜舉宴行賞者因拜守仁南京兵部尙書守仁不赴請歸省已論功封特進光祿大夫柱國新建伯世襲歲祿一千石然不予鐵券歲祿亦不給諸同事有功者惟吉安守伍文定至大官當上賞其他皆明示遷而陰絀之廢斥無存者守仁憤甚時已丁父憂屢疏辭爵乞錄諸臣功咸報寢免喪亦不召久之所善席書及門人方獻夫黃綰以議禮得幸言於張璁桂萼將召用而費宏故銜守仁復沮之屢推兵部尙書三邊總督提督團營皆弗果用嘉靖六年思恩田州土酋盧蘇王受反總督姚鏌不能定乃詔守仁以原官兼左都御史總督兩廣兼巡撫綰因上書訟守仁功請賜鐵券歲祿並敘討賊諸臣帝咸報可守仁在道疏陳用兵之非且言思恩未設流官土酋歲出兵三千

聽官征調既設流官我反歲遣兵數千防戍是流官之設無益可知
且田州鄰交阯深山絕谷悉獠獍盤據必仍設土官斯可藉其兵力
爲屏蔽若改土爲流則邊鄙之患我自當之後必有悔章下兵部尙
書王時中條其不合者五帝令守仁更議十二月守仁抵潯州會巡
按御史石金定計招撫悉散遣諸軍畱永順保靖土兵數千解甲休
息蘇受初求撫不得聞守仁至益懼至是則大喜守仁赴南寧二人
遣使乞降守仁令詣軍門二人竊議曰王公素多詐恐給我陳兵入
見守仁數二人罪杖而釋之親人營撫其衆七萬奏聞於朝陳用兵
十害招撫十善因請復設流官量割田州地別立一州以岑猛次子
邦相爲吏目署州事俟有功擢知州而於田州置十九巡檢司以蘇
受等任之並受約束於流官知府帝皆從之斷藤峽獠賊上連八寨
下通仙臺花相諸洞蠻盤亘三百餘里郡邑罹害者數十年守仁欲
討之故畱南寧罷湖廣兵示不再用伺賊不備進破牛腸六寺等十

餘寨峽賊悉平遂循橫石江而下攻克仙臺花相白石古陶羅鳳諸賊令布政使林富率蘇受兵直抵八寨破石門副將沈希儀遂斬軼賊盡平八寨始帝以蘇受之撫道行人奉璽書獎諭及奏斷簾峽捷則以手詔問閣臣楊一清等謂守仁自誇大且及其生平學術一清等不知所對守仁之起由璫薦璫故不善守仁以璫強之後璫長吏部璫入內閣積不相下璫暴貴喜功名風守仁取交趾守仁辭不應一清雅知守仁而黃綰嘗上疏欲令守仁入輔毀一清一清亦不能無移憾璫遂顯詆守仁征撫交失賞格不行獻夫及霍韜不平上疏爭之言諸徭爲患積年初嘗用兵數十萬僅得一田州旋復召寇守仁片言馳諭思田稽首至八寨斷簾峽賊阻深巖絕岡國初以來未有輕議勦者今一舉蕩平若拉枯朽議者乃言守仁受命征思田不受命征八寨夫大夫出疆有可以安國家利社稷專之可也況守仁固承詔得便宜從事者乎守仁討平叛藩忌者誣以初同賊謀又

誣其輦載金帛當時大臣楊廷和喬宇飾成其事至今未白夫忠如
守仁有功如守仁一屈於江西再屈於兩廣臣恐勞臣灰心將士解
體後此疆圉有事誰復爲陛下任之帝報聞而已守仁已病甚疏乞
骸骨舉郎陽巡撫林富自代不俟命竟歸行至南安卒年五十七喪
過江西軍民無不縞素哭送者守仁天姿異敏過目成誦年十一從
父過江望金山命賦詩語奇甚十七謁上饒婁諒與論朱子格物大
旨謂聖人可學而至深有所契還家日端坐講讀五經不苟言笑少
好俠喜談兵長與李夢陽何景明輩切劘爲古文詞謝病歸時築室
陽明洞中又習導引術泛濫二氏學者數年無所得謫龍場窮荒無
書日繹舊聞忽悟格物致知當自求諸心不當求諸事物喟然曰道
在是矣遂篤信不疑屹然以斯道爲己任其爲教專以致良知爲主
謂宋周程二子後惟象山陸氏簡易直捷有以接孟氏之傳而朱子
集註或問之類乃中年未定之說雖旦夕軍旅與儒生講學不廢嘗

語門人曰良知者心之本體心之本體無起無不起雖妄念之發而良知未嘗不在但人不知存則有時而或放耳雖昏塞之極而良知未嘗不明但人不知察則有時而或蔽耳良知不由見聞見聞莫非良知之用故良知不滯於見聞而亦不離乎見聞蓋曰無善無惡者心之體有善有惡者心之用知善知惡者良知爲善去惡者格物此其說之宗旨也泰和歐陽德安福鄒守益吉水羅洪先輩相與尊信之其徒慕其說之簡易無問遠近賢不肖踴躍而從者甚衆然退而叛道悖德者亦不少視程朱之門人有入門有實地隨分各得者異焉著述甚多如傳習錄及文集皆行於世守仁旣卒桂萼奏其擅離職守帝大怒下廷臣議萼等言守仁事不師古言不稱師欲立異以爲高則非朱熹格物致知之論知衆論之不予則爲朱熹晚年定論之書號召門徒互相倡和才美者樂其任意庸鄙者借其虛聲傳習轉訛背謬彌甚但討捕輦賊禽獲叛藩功有足錄宜免追奪伯爵以

章大信禁邪說以正人心帝乃下詔停世襲卹典俱不行隆慶初廷臣多頌其功詔贈新建侯諡文成二年子其子正億世襲伯爵述曰白沙之主靜陽明之致知其學皆推本於周程然各立宗旨門弟子又從而加甚焉是以卒有禪派之議虛齋飭躬砥行動遵古人其所著易四子蒙引等書甚有資於學者第專以主虛爲教使襲其說而不察幾何不與主靜良知之說同一流弊邪

關里文獻考卷六十九終

關里文獻考卷七十

從祀賢儒第十四之二十八

明

胡居仁字叔心江西餘干人聞吳與弼講學崇仁往從之遊絕意仕進其學以主忠信爲先以求放心爲要操而勿失莫大乎敬因以敬名其齋端莊凝重對妻子如嚴賓手置一冊詳書得失用自程考鶉衣簞食晏如也四方來學者甚衆皆告之曰學以爲己勿求人知語治世則曰惟王道能使萬物各得其所著有居業錄蓋取修辭立誠之義每言與吾道相似莫如禪學後之學者誤認存心多流於禪或欲屏絕思慮以求靜不知聖賢惟戒慎恐懼自無邪思不求靜未嘗不靜也故卑者溺於功利高者鶩於空虛其患有二一在所見不真一在功夫間斷嘗作進學箴曰誠敬旣立本心自存力行旣久全體皆仁舉而措之家齊國治聖人能事此其畢矣居仁性行淳篤父

病劇嘗糞以驗甘苦居喪骨立非杖不能起三年不入寢門與人語終日不及利祿隱居梅溪事親講學之外謝絕人事閒與其徒遊閩浙道金陵泛彭蠡而上歷覽名山大川以博其識與羅倫張元禎友善數會於弋陽龜峯嘗言陳獻章學近禪悟莊景詩止豪曠此風旣成爲害不細又病儒者撰述繁蕪謂朱子註參同契陰符經皆不作可也督學李齡鍾成相繼聘主白鹿書院過饒城淮王請講易傳待以賓師之禮是時吳與弼以學名於世受知於朝廷然學者或有閒言居仁閣修自守布衣終其身人以爲薛瑄之後粹然一出於正居仁一人而已卒年五十一萬歷十三年追諡文敬

羅欽順字允升江西泰和人弘治六年進士及第授編修遷南京國子監司業與祭酒章懋以實行教士未幾奉親歸因乞終養時劉瑾方作威福南京吏部用其新例以欽順給假不合奏或謂欽順宜一面瑾欽順曰是舉吾生平而盡棄之也遂奪職爲民瑾誅復官上疏

言四事曰修德曰勤政曰作士氣曰審時宜疏入留中遷南京太常少卿再遷南京吏部右侍郎入爲吏部左侍郎世宗卽位命攝尙書事上疏言久任超遷法當疏通及大禮議起請慎大禮以全聖孝皆不報遷南京吏部尙書省親乞歸改禮部尙書會居憂未及拜再起禮部尙書辭又改吏部尙書下詔敦促再辭許致仕有司給祿米時張璁桂萼以議禮驟貴秉政樹黨屏逐正人欽順恥與同列故屢詔不起里居二十餘年足不入城市潛心格物致知之學王守仁以心學立教才知之士翕然師之欽順致書守仁略曰聖門設教文行兼資博學於文厥有明訓如謂學不資於外求但當反觀內省則正心誠意四字亦何所不盡必於入門之際加以格物工夫哉守仁得書亦以書報大略謂理無內外性無內外故學無內外講習討論未嘗非內也反觀內省未嘗遺外也反復二千餘言欽順再以書辨曰執事云格物者格其心之物也格其意之物也格其知之物也正心者

正其物之心也誠意者誠其物之意也致知者致其物之知也自有大學以來未有此論夫謂格其心之物格其意之物格其知之物凡爲物也三謂正其物之心誠其物之意致其物之知其爲物也一而已矣就三而論以程子格物之訓推之猶可通也以執事格物之訓推之不可通也就一物而論則所謂物果何物也如必以爲意之用雖極安排之巧終無可通之日也又執事論學書有云吾心之良知卽所謂天理致吾心良知之天理於事物則事物皆得其理矣致吾心之良知者致知也事事物物各得其理者格物也審如所言則大學當云格物在致知不當云致知在格物與物格而後知至矣書未及達守仁已沒欽順爲學專力於窮理存心知性初由釋氏入旣悟其非乃力排之謂釋氏之明心見性與吾儒之盡心知性相似而實不同釋氏之學大抵有見於心無見於性今人明心之說混於禪學而不知有千里毫釐之謬道之不明將由於此欽順有憂焉爲

著困知記自號整菴年八十三卒贈太子太保諡文莊

述曰胡敬齋羅整菴宗伊洛之緒言守朱門之遺矩學先格致德尙躬行立說著書粹然一出於正誠篤行君子矣明自白沙陽明聚徒設教其弟子各立門戶因有姚江之學有江門之學宗江門者孤行獨詣其傳不遠宗姚江者乃至別立宗旨顯與朱子相牴牾百年之後其教大行雖其傳述之過抑亦立說者先不能無病與整菴早見及此故與書往復辨論惜後書未達而陽明早卒也

關里文獻考卷七十終

關里文獻考卷七十一

從祀賢儒第十四之二十九

國朝

陸隴其初名龍其後改今名字稼書浙江平湖人唐宰相宣公贇之裔也曾祖錫蔭祖憲父元世以儒術稱世父燦前明進士爲濟南府推官崇禎十年我

大清兵破濟南闔署殉難迨隴其以官起家始得以其祖及世父衣冠招魂葬鄉里隴其自幼端重靜默穎悟過人年十一爲文卽原本經術少長厲志聖賢之學專以程朱爲宗居敬窮理粹然一出於正其於富貴利達泊如也會明運將終盜賊蠭起隨父倉皇奔避患難中猶讀書不輟已而書籍復爲遊兵所掠則自訟曰禹能行疇範之道天乃錫禹以疇範之書我實不能故天靳之益痛自刻厲嘗曰大丈夫生斯世攬轡澄清非異人任今日之憂豈爲溫飽哉復究心天文

畱意經濟康熙五年舉於鄉九年成進士年已四十一矣以需次復歸家教授著書又五年選授江南嘉定知縣嘉定爲濱海大邑民多逐末富商鉅室散處市鎮武斷暴橫相沿成俗富者競奢麗貧者舞刀筆而不肖胥役復相倚爲姦利號稱難治又地不產米漕糧任之他邑而代輸其折色積逋動以萬計令率坐是去官隴其至歎曰民不輸賦以貧也其所以貧風俗爲之也譬少年以遊冶傷其元氣力不能服勞爲父兄者禁其遊冶則元氣自復不禁而予以飲食抑末矣今且不爲飲食而又督過之則官與民俱病固其所耳故其爲治一以鋤豪強抑胥吏禁侈靡變風俗爲主逾年風俗爲之大變訟不至庭案牘幾廢惟日爲上官訊他邑事先是催科者惟假敲扑逋者逾限轉須杖錢自隴其爲立甘限法令應輸者自勒輸限屆期及半亦得宥以故絕不用杖而輸者爭至遂無逋負初邑有胥吏數千至是退去者過半會福建按察使缺

上命天下選賢能愛民之官不拘資格擢用都御史魏象樞以隴其薦而江寧巡撫慕天顏與隴其不相能疏請更調旋文致以諱盜落職其去任也與妻同駕一舟惟圖書數卷織機一張而已百姓爲之罷市號哭攀畱者數萬人隴其皆慰遣之衆知不可畱乃爭立祠尸祝謂自建縣五百年來未嘗有此官也十七年

詔舉博學鴻詞工部主事吳源起以隴其薦會丁父憂不果試明年象樞廉得其被誣狀乃疏劾天顏舉劾不公而力陳隴其廉介是年夏上命廷臣各舉廉吏象樞疏舉十人復以隴其薦有

旨服滿補官然隴其雅不欲仕服闋仍家居講學著書以郡縣敦迫再四二十二年始就道復求改教職不許乃補直隸靈壽知縣靈壽北枕太行南瀕滹沱民貧地瘠水旱頻仍隴其拊循安輯務在與民休息時派運

大內灰車靈壽小縣出五輛較大邑轉多經年費六七百金民不能

給前令董祈請減之不能得隴其至復請於監司至以去就爭始得減二輔邑舊多荒地會以言者申隱地處分之例民益相戒不敢開墾隴其諄切曉諭於是漸有關者終隴其任竟無一畝首報前此縣令審丁率以溢額爲功隴其曰如是是驅之逃耳乃覈實具報至虧一千五百有奇且請於上官曰若就筋疲骨盡之民猶復責其包賠一點良心實難自昧縣令平日失於撫綏以致戶口缺額聽候上官處分以爲溺職之戒卒從其議民困以蘇巡撫于成龍泣任諮訪利弊隴其條陳六事一言春夏之餉請緩征至秋成二言荒熟不常請使有司得便宜以熟補荒已墾成熟者十年而後起科三言水道宜疏處請司農度其費以次分年舉行四言墾荒及河淤所入之穀請畱本處備荒五言書辦工食心紅紙張修宅家伙及供應上司過往等類宜稍復存畱款項以杜私派之弊六言審丁不宜求溢額果有溢額者請畱以積穀有逃絕以此補之有關則蠲之成龍歎曰此真

久大之謀也每公餘卽詣學宮聚諸生講說聖賢之道有質疑問難者與往復辨析明白曉暢於是人皆厲志於學二十九年畿輔大饑命發帑以賑靈壽得三千兩太守約以二千及民繳千兩爲勘荒費鄰邑有已散而復追者隴其獨持不可曰上負朝廷下欺百姓隴其不爲也巡撫格爾古德于成龍先後兩以疏薦學士李光地承

顧問亦稱其畱心性學清廉愛民以大學士余國柱沮皆不果召後都御史陳廷敬復薦之乃行取試四川道監察御史召至見廷敬獨不稱師生廷敬歎服隴其爲御史首疏陳畿輔情形曰臣官畿輔者久知畿輔民情畿輔邊山一帶土瘠民貧異於他方荒多熟少自昔而然加以康熙十二年以後軍興緊急雜派煩多民困滋甚豐年僅可支持一遇水旱流離萬狀幸數年以來

皇上加意撫綏禁止私派不惜蠲賑鳩鵲之民得苟延殘喘然以言乎家給人足則尙未也臣觀自古豐亨之治皆非一日而成唐虞之世

其初亦不免黎民阻飢堯舜兢兢業業積久而後蒸民乃粒漢自高惠而後多方休養至於文景然後天下殷富唐之太宗日夜講求治道至貞觀之末然後民食充足今天下平定猶未久也而又疊遭水旱故雖

皇上之勤恤民隱而百姓猶未免於艱難無怪其然矣求其殷富亦無他道惟在

皇上常持此勤恤之心期之以積久而勿責效於旦夕恩已厚而不嫌其更厚心已周而不厭其更周則家給人足之盛庶乎可望矣至於目前所當議者臣見上年畿輔荒旱實異尋常其被災各州縣內雖間有未被災之處亦不過稍有升合之獲差勝於被災者耳初奉

上諭將二十八年及二十九年上半年錢糧盡行蠲免已經撫臣出示曉諭後因部議分別被災州縣中有不被災地畝不准槩蠲百姓甚苦撫臣不得已題請秋後帶徵地方得以粗安第今歲秋收稍稔既

徵其新又徵其舊臣恐非積貧之民所能堪也雖曰豐年所入幾何穀價又賤其值無幾私債之迫索者衣服之典當者已去其大半仰事俯育仍憂不足又可責其兼完新舊之糧乎若非

皇上曲加垂恤臣恐地方有司惟知考成之是急不顧民力之難勝甚非

皇上蠲免之初意也疏入

聖祖稱善再三顧左右卽下其疏於戶部終格於部議及奉特旨始盡蠲免湖南巡撫于養志丁憂督臣請令在任守制

詔廷臣會議隴其以疏論之曰九卿科道會議湖南巡撫于養志在任守制一事臣以資淺不在會議之列不知所議若何及詢問與議諸臣謂會議之時昌言其不可者固有其人而依回不斷者比比而是臣竊怪之此明白顯易之事有何可疑而依回若是夫治天下之不可不以孝易明也在任守制之非所以教孝易明也天下正當承平

之時湖南又非用兵之地無藉於在任守制易明也

皇上以孝治天下在廷諸臣沐浴於

皇上孝治之中久矣何難一言以直斷其不可邪且臣不知議者以于養志爲何如人如其非賢者邪則固不當使之在任守制矣如其誠賢者邪則必不肯安心於在任守制矣在督臣代爲題請或從愛惜人才起見然臣以爲使之解任全孝正所以深愛惜之況

皇上一日所行天下萬世奉爲法程者也若使一撫臣因督臣之題請而畱將來督撫之丁憂者皆將援此爲例其不思僥倖奪情者鮮矣名教自此而弛綱常自此而壞此端一開關係天下實非淺鮮至於湖南一省之人是則是倣不復知有父母又無足論矣竊以爲督臣所請無庸議可也

上從之三十年五月京師亢旱

詔求直言隴其上三摺子言事一編審人丁宜痛除積弊一積欠錢糧

宜請豁免一捐免保舉宜急停止輔臣以用摺子不合爲辭不得達
隴其退復具疏曰捐納一事原非

皇上所欲行不過因一時軍需孔亟不得已而暫開復恐其賢愚錯雜
有害百姓故立保舉之法以防弊爲慮深遠矣近復因大同宣府運
送草豆并保舉而亦許捐焉則與正途無復分別甚非

皇上立法防弊之初意且保舉所重莫重於清廉故督撫保舉必有清
廉字樣方爲合例若保舉可以捐納則是清廉二字可捐納而得也
此亦不待辨而知其不可矣若夫前此有捐納先用一例正途爲之
壅滯至今尙未疏通故

皇上灼見其弊久經停止雖前九卿因運送草豆會議酌開事例亦未
及此蓋誠知其爲選途之害而不敢輕議也且捐納先用之人大抵
皆奔競躁進之人故多一先用之人卽多一害民之人此又不待辨
而知其不可者矣故敢瀆陳芻蕘惟

皇上採擇臣更有請者臣竊見近日督撫於捐納之員有遲之數年既不保舉又不參劾者不知此等官員果清廉乎非清廉乎抑或在清濁之間未可驟舉驟劾乎夫既以捐納出身又不能發憤自勵則其志趣卑陋甘於污下可知使之久居民上其荼毒小民不知當何如故竊以爲不但保舉之捐納急當停止而保舉之限期更當酌定不但目前先用之例萬不可開而從前先用之人不可不加稽核伏乞勅部查一切捐納之員到任三年而無保舉者卽令休致庶更治可清選途可疏而民生可安矣有

旨同九卿會議司農主議不以爲然隴其又上議曰謹議得捐納一途實係賢愚錯雜惟有保舉一綫可防其弊雖不敢謂督撫之保舉盡公然猶愈於竟不保舉也今若并此一綫而去之何以服天下之心卽貪污之輩或自有督撫之糾參而其僥倖免於糾參者遂得與正途一體陞轉國體之謂何恐未可云無礙也雖有次年三月停止之

期然待至次年三月而後停則此輩無有不捐納者矣卽無有不一
體陞轉者矣澄敘官方之大典豈不蕩然掃地乎此臣所以有速停
保舉捐納之請也至於設立保舉而不限期則不肖之員多因循
一日百姓多受累一日亦非

皇

上愛養斯民之意議者或因限以三年而無保舉卽令休致恐近於

刻不知此輩原係白丁捐納得官惟利是圖何嘗知有百姓踞於民
上者三年亦已甚矣又可久乎况休致在家仍得儼然列於搢紳其
榮多矣何謂刻也卽云設立限期或反生其營求之弊此在督撫不
賢則誠有此若督撫賢則何處營求臣不敢謂天下必無一賢明之
督撫也卽使督撫不賢亦必不能盡捐納之人而保之此臣請定保
舉限期一議亦從吏治民生起見未有吏治不清而民生可安者未
有仕途龐雜而吏治能清者也九卿迫令改議隴其執之愈堅由是
眾寢不悅遂劾其拘執資格致捐納之人猶豫觀望遲悞軍需飾虛

詞系政事負言官職擬革職奉天安插李光地及順天府尹衛既齊面奏救之得

旨寬免尋奉

命巡視北城然終以與眾齟齬試俸期滿都察院擬以不稱職對品調用隴其旣以剛直罷仍歸家教授明年卒於家年六十三又明年江南學政員缺廷臣會推翰詹大僚

上不允

特旨著陸隴其去大學士王熙奏隴其已故

上嗟歎久之曰本朝如此人不可多得矣蓋隴其忠鯁雖不合於時其獲知於

聖主有如此也隴其德器粹然文必載道所著有文集十二卷外集六卷四書大全四書困勉錄四書講義續編松陽四書講義禮經會元讀禮隨筆讀朱隨筆戰國策去毒呻吟語質疑衛濱日鈔靈壽縣志

等書皆發明經學講求治理有裨實用而不爲詞章之學其教人以
居敬窮理爲主謂窮理而不居敬則玩物喪志而失於支離居敬而
不窮理則將掃見聞空善惡其不墮於佛老以至於師心自用者鮮
矣又因明季異說紛紜程朱正學幾墜思力挽之故其學術辨止篇
曰漢唐之儒崇正學者尊孔孟而已孔孟之道尊則百家之言熄自
唐以後異端曲學知儒者之尊孔孟也於是皆託於孔孟以自行其
說我曰孔孟彼亦曰孔孟而學者遂莫從而辨其是非程朱出而崇
正闢邪然後孔孟之道復明而天下尊之自宋以來異端曲學知儒
者之尊程朱也於是又託於程朱以自行其說我曰程朱彼亦曰程
朱學者又莫從而辨其是非程朱言天理則亦言天理天理之名同
而其所指則霄壤矣程朱言至善則亦言至善至善之名同而其所
指則冰炭矣程朱言靜言敬則亦言靜亦言敬靜敬之名同至所以
爲靜敬則適越而北轅矣程朱之言有可假借者則曰程朱固若是

也有不可假借者則曰此其中年未定之論也黑白淆而雅鄭混雖
有好古篤志之君子力扶正學亦止知其竊叛程朱之非至其陽尊
而陰篡之者則固不得而盡絕矣蓋其弊在宋元之際卽有之而莫
甚於明之中葉自陽明王氏倡爲良知之說以禪之實而託儒之名
且輯朱子晚年定論一書以明己之學與朱子未嘗異龍溪心齋近
溪海門之徒從而衍之王氏之學徧天下幾以爲聖人復起而古先
聖賢下學上達之遺法滅裂無餘學術壞而風俗隨之其弊也至於
蕩軼禮法蔑視倫常天下之人恣睢橫肆不復自安於規矩繩墨之
內而百病交作於是涇陽景逸起而救之痛言王氏之弊使天下學
者復尋程朱之遺規向之邪說詖行爲之稍變然至於本源之際所
謂陽尊而陰篡之者猶未能盡絕之也治病而不能盡絕其根則其
病有時而復作故至於啓禎之際風俗愈壞禮義掃地以至於不可
收拾其所從來非一日矣故愚以爲明之天下不亡於寇盜不亡於

朋黨而亡於學術學術之壞所以釀成寇盜朋黨之禍也今之說者猶曰陽明與程朱同師孔孟同言仁義雖意見稍異然皆聖人之徒也何必力排而深拒之乎夫使其自外於孔孟自外於仁義則天下之人皆知其非又奚待吾之辨惟其似孔孟而非孔孟似仁義而非仁義所謂失之毫釐差以千里此其所以不容不辨耳或又曰陽明之流弊非陽明之過也學陽明之過耳程朱之學豈獨無流弊乎今之學程朱者未必皆如敬軒敬齋月川之絲毫無疚也其流入於偏執固滯以至僨事者亦有矣則亦歸罪程朱乎是又不然夫天下有立教之弊有末學之弊末學之弊如源清而流濁也立教之弊如源濁而流亦濁也學程朱而偏執固滯是末學之弊也若夫陽明之所以為教則其源先已病矣是豈可徒咎末學哉中篇曰陽明以禪之實而託於儒其流害固不可勝言矣然其所以為禪者如之何曰明乎心性之辨則知禪矣知禪則知陽明矣今夫人之生也氣聚而成

形而氣之精英又聚而爲心是心也神明不測變化無方要之亦氣也其中所具之理則性也故程子曰性卽理也邵子曰心者性之郭郭朱子曰靈處是心不是性是心也者性之所寓而非卽性也性也者寓於心而非卽心也先儒辨之亦至明矣若夫禪者則以知覺爲性而以知覺之發動者爲心故彼之所謂性則吾之所謂心也彼之所謂心則吾之所謂意也其所以滅彝倫離仁義張皇詭怪而自放於準繩之外者皆由不知有性而以知覺當之耳何則旣以知覺爲性則其所欲保養而勿失者惟是而已一切人倫庶物之理皆足以爲我之障而惟恐其或累宜其盡舉而棄之也陽明言性無善無惡蓋亦指知覺爲性也其所謂良知所謂天理所謂至善莫非指此而已故其言曰佛氏本來面目卽我門所謂良知又曰良知卽天理又曰無善無惡乃所謂至善雖其縱橫變幻不可究詰而其大旨亦可睹矣充其說則人倫庶物固於我何有而特以束縛於聖人之教未

敢肆然決裂也則又爲之說曰良知苟存自能酬酢萬變非若禪家之遺棄事物也其爲說則然然學者苟無格物窮理之功而欲持此心之知覺以自試於萬變其所見爲是者果是而見爲非者果非乎又況其心本以爲人倫庶物初無與於我不得已而應之以不得已而應之心而處夫未嘗窮究之事其不至於顛倒錯謬者幾希其倡之者雖不敢自居於禪陰合而陽離其繼起者則直以禪自任不復有所忌憚此陽明之學所以爲害於天下也涇陽景逸深懲其弊知夫知覺之非性而無善無惡不可以言性其所以排擊陽明者亦可謂得其本矣然其學也專以靜坐爲主則其所重仍在知覺雖云事物之理乃吾性所固有而亦當窮究然旣偏重於靜則窮之未必能盡其精微而不免於過不及是故以理爲外而欲以心籠罩之者陽明之學也以理爲內而欲以心籠罩之者高顧之學也陽明之病在認心爲性高顧之病在惡動求靜我觀高子之論學也言一貫則以

爲是入門之學言盡心則以爲盡心然後知性言格物則曰知本之
 謂物格與程朱之論往往齟齬而不合者無他蓋欲以靜坐爲主則
 凡先儒致知窮理存心養性之法不得不爲之變易夫靜坐之說雖
 程朱亦有之不過欲使學者動靜交養無頃刻之離耳非如高子困
 學記中所言必欲澄神默坐使呈露面目然後有以爲下手之地也
 由是觀之則高顧之學雖箴砭陽明多切中其病至於本源之地仍
 不能出其範圍豈非陽明之說浸淫於人心雖有大賢不免猶蹈其
 弊乎吾嘗推求其故天下學者所以樂趨於陽明而不可遏者有二
 一則爲其學者可以縱肆自適非若程朱之履繩蹈矩不可假借也
 一則其學專以知覺爲主謂人身有生死而知覺無生死故其視天
 下一切皆幻而惟此爲真故不賢者旣樂其縱肆而賢者又思求其
 無生死者此所以羣趨而不能舍嗚呼縱肆之不可易明也至於無
 生死之說則真禪家之妄耳學者取程朱陰陽屈伸往來之論潛心

熟玩焉其理亦彰彰矣奈何不此之學而彼之是惑乎下篇曰自陽明之學興從其學者流蕩放佚固有之矣亦往往有大賢君子出於其閒其功業足以潤澤生民其名節足以維持風俗今日陽明之學非正學也然則彼皆非與若夫明之末季潰敗不振蓋氣運使然豈盡學術之故也明之衰可以咎陽明則宋之衰亦將咎程朱周之衰亦將咎孔孟乎是又不然周宋之衰孔孟程朱之道不行也明之衰陽明之道行也自嘉隆以來秉國鈞作民牧者孰非浸淫於其教者乎始也倡之於下繼也遂持之於上始也爲議論爲聲氣繼也遂爲政事爲風俗禮法於是而弛名教於是而輕政刑於是而紊僻邪詭異之行於是而生縱肆輕狂之習於是而成雖曰喪亂之故不由於此吾不信也若其閒大賢君子學問雖偏而人品卓然者則又有故蓋天下有天資之病有學術之病有天資僻而學術正者有學術僻而天資美者恆視其勝負之數以爲其人之高下如柴之愚參之魯

師之辟由之嗟而卒爲聖門高弟此以學勝其天資者也如唐之顏
魯公宋之富鄭公趙清獻皆溺於神仙浮屠之說而志行端方功業
顯赫爲唐宋名臣此以天資勝其學術者也人見顏富諸公之志行
功業則以爲神仙浮屠之無損於人如此且以爲諸公之得力神仙
浮屠如此是何異見氣盛之人冒風寒而不病而謂不病之得力於
風寒善飲之人多飲而惺然而謂惺然之得力於多飲豈其然乎今
自陽明之教盛行天下靡然從之其天資純粹不勝其學術之僻流
蕩忘返者不知凡幾矣閒有卓越之士雖從其學而修身勵行不愧
古人是非其學之無弊也蓋其天資之美而學術不能盡蔽之亦如
顏富諸公學於神仙浮屠而其人其行則非神仙浮屠之可及也是
故不得因其學而棄其人亦豈可因其人而遂不敢議其學哉且人
但見顏富之品行卓犖而不知向使其不溺於異學則其所成就豈
特如此而已但見明季諸儒爲王氏之學者亦有大賢君子出其閒

而不知向使其悉遵程朱遺法不談良知不言無善無惡不指心爲性不偏於靜坐不以一貫盡心爲入門不以物格爲知本則其造詣亦豈僅如是而已邪譬諸日月之蝕然不知其所虧之已多而但指其僅存之光以爲蝕之無傷於光豈不誤乎嗚呼正學不明人才陷溺中人以下旣汨沒而不出而大賢者亦不能自盡其才可勝歎哉夫陳王之病世儒類能言之至若斥陳王而仍入於陳王者則非隴其之深抉閭奧細察秋毫不能發其隱而大服其心也乾隆元年九卿等因議原任一等公福善等諡法附奏云原任御史陸隴其精研程朱之學實爲昭代醇儒於雍正二年經九卿議准從祀文廟但以官職未合請諡之例當年未經予諡臣等謹按通典云諡主於行而不繫爵故宋儒如胡瑗呂祖謙諸人官職未顯俱得予諡今隴其旣經從祀文廟似亦應追諡以示表章得

旨賜諡清獻贈內閣學士兼禮部侍郎

述曰清獻罷御史時議者有責其持論太嚴進言太驟致觸忤眾怒
席未及煖以去者嗚呼是豈知清獻者哉夫清獻浮沉下僚年踰六
十一旦得居言路已迫桑榆若再委蛇觀望不踰年而卽卒矣是終
無一言以去豈不有負斯職邪昔歐陽公上書范司諫責以朝拜官
而夕奏疏陽城久居諫議而不言昌黎作諍臣論以諷之清獻之不
肯和平委曲相時而動正清獻之所以爲清獻而非淺見薄識者所
能窺及也又行狀及年譜載其爲令時諸政績皆循吏所能爲故不
具論論其有關學術治道者

闕里文獻考卷七十一終

關里文獻考卷七十二

從祀賢儒第十四之三十

昔明初罷祀揚雄及嘉靖間張璁釐正祀典又罷荀況戴聖劉向賈逵馬融何休王肅王弼杜預吳澄十人而改遽瑗林放鄭康成鄭眾盧植服虔范甯七人祀於鄉我

朝雍正二年

詔九卿議可復從祀者於是復祀遽瑗林放鄭康成范甯四人乾隆二年又復祀吳澄一人尙有荀況劉向戴聖揚雄鄭眾賈逵馬融盧植何休服虔王肅王弼杜預等十三人今考其傳別敘從祀賢儒之後

周

荀況趙人年五十遊學於齊初齊宣王喜文學遊說之士如騶衍淳于髡田駢接子慎到環淵之徒七十六人皆賜列第爲上大夫襄王時田駢之屬皆已死而荀卿最爲老師齊尙修列大夫之缺荀卿三

爲祭酒焉齊人或譏荀卿荀卿乃適楚春申君以爲蘭陵令春申君死而荀卿廢因家蘭陵李斯嘗爲弟子已而相秦荀卿嫉濁世之政亡國亂君相屬不遂大道而營於巫祝信禳祥鄙儒小拘如莊周等又滑稽亂俗於是推儒墨道德之行事興壞序列著數萬言而卒

漢

劉向字子政漢楚元王交元孫也父德爲宗正封陽城侯向本名更生年十二以父任爲輦郎旣冠以行修飭擢爲諫大夫是時宣帝循武帝故事招選名儒俊材置左右更生以通達能屬文辭與王褒張子橋等並進對獻賦頌凡數十篇帝復興神仙方術之事而淮南有枕中鴻寶苑祕書書言神仙使鬼神爲金之術及鄒衍重道延命方世人莫見德武帝時治淮南獄得其書更生幼而讀誦以爲奇獻之言黃金可成帝令典尚方鑄作事費甚多方不驗乃下更生更吏劾更生鑄僞黃金繫當死兄陽城侯安民上書入國戶半贖更生罪帝

亦奇其材得踰冬減死論會初立穀梁春秋徵更生受穀梁講論五經於石渠復拜爲郎中給事黃門遷散騎諫大夫給事中元帝初卽位太傅蕭望之爲前將軍少傅周堪爲諸更光祿大夫皆領尙書事甚見尊任更生年少於望之堪然二人重之薦更生宗室忠直明經有行擢爲散騎宗正給事中與侍中金敞拾遺左右四人同心輔政患苦外戚許史在位放縱而中書宦官弘恭石顯弄權望之堪更生議欲白罷退之未白而語泄遂爲許史及恭顯所譖愬堪更生下獄及望之皆免官其春地震夏客星見昴卷舌閏帝感悟下詔賜望之爵關內侯奉朝請秋徵堪更生欲以爲諫大夫恭顯白皆爲中郎冬地復震時恭顯許史子弟侍中諸曹皆側目於望之等更生懼焉乃使其外親上變事言地動殆爲恭等宜退恭顯以章蔽善之罰進望之等以通賢者之路書奏恭顯疑其更生所爲白請考姦詐辭果服遂逮更生繫獄坐免爲庶人望之自殺天子甚悼恨之乃擢周堪爲

光祿勳堪弟子張猛光祿大夫給事中大見信任恭顯憚之數譖毀焉更生見堪猛在位幾已得復進懼其傾危乃上封事言謠邪並進所以致災異狀恭顯見其書愈與許史比而怨更生等是歲夏寒日青無光恭顯及許史皆言堪猛用事之咎帝內重堪又患眾口之浸潤無所取信時長安令楊興以材能幸常稱譽堪帝欲以爲助乃見問興朝臣斷斷不可光祿勳何也興者傾巧士謂帝疑堪因順指短堪謂可賜爵關內侯勿令典事帝於是疑會城門校尉諸葛豐亦言堪猛短因發怒免豐又左遷堪爲河東太守猛槐里令顯等專權日甚後三歲餘孝宣廟闕災其晦日有蝕之於是帝召諸前言日變在堪猛者責問皆稽首謝乃因下詔徵堪詣行在所拜爲光祿大夫秩中二千石領尙書事猛復爲大中大夫給事中顯幹尙書尙書五人皆其黨也堪希得見常因顯白事事決顯口會堪疾瘖口不能言而卒顯誣譖猛令自殺於公車更生傷之乃著疾讒摘要救危及世頌

凡八篇依興古事悼己及同類也遂廢十餘年成帝卽位顯等伏辜更生乃復進用更名向向以故九卿召拜爲中郎使領護三輔都水數奏封事遷光祿大夫是時帝元舅平陽侯王鳳爲大將軍秉政倚太后專國權兄弟七人皆封爲列侯時數有大異向以爲外戚貴盛鳳兄弟用事之咎而帝方精於詩書觀古文詔向領校五經祕書向見向書洪範箕子爲武王陳五行陰陽休咎之應乃集合上古以來歷春秋六國至秦漢符瑞災異之記推迹行事連傳禍福著其占驗比類相從各有條目凡十一篇號曰洪範五行傳論奏之帝心知向忠精故爲鳳兄弟起此論也然終不能奪王氏權久之營起昌陵數年不成復還歸延陵制度泰奢向上疏諫帝甚感向言而不能從其計向睹俗彌奢淫而趙衛之屬起微賤踰禮制以爲王教由內及外自近者始故採取詩書所載賢妃貞婦興國顯家可法則及孽嬖亂亡者序次爲列女傳凡八篇以戒天子及采傳記行事著新序說苑

凡五十篇奏之數上疏言得失陳法戒書數十上以助觀覽補遺闕
帝雖不能盡用然內嘉其言常嗟歎之時帝無繼嗣政由王氏出灾
異浸甚向雅奇陳湯智謀與相親友獨謂湯曰灾異如此而外家日
甚其漸必危劉氏吾幸得同姓末屬累世蒙漢厚恩身爲宗室遺老
歷事三主上以我先帝舊臣每進見常加優禮吾而不言誰當言者
遂上封事極諫書奏帝召見向歎息悲傷其意謂曰君且休矣吾將
思之以向爲中壘校尉向爲人簡易無威儀廉靖樂道不交接世俗
專積思於經術畫誦書傳夜觀星宿或不寐達旦元延中星孛東井
蜀郡岷山崩雍江向惡此異懷不能已復上書奏且曰天文難以相
曉臣雖圖上猶須口說然後可知願賜清燕之間指圖陳狀帝輒入
之然終不能用也向每召見數言公族者國之枝葉枝葉落則本根
無所庇蔭方今同姓疎遠母黨專政祿去公室譏刺王氏及在位大
臣其言多痛切發於至誠帝數欲用向爲九卿輒不爲王氏居位者

及丞相御史所持故終不遷居列大夫官前後三十餘年年七十二卒

戴聖字次君梁人與從父德並事君蒼授曲臺禮德號大戴聖號小戴以博士論石渠及爲九江太守治行多不法刺史何武行部錄囚徒有所舉以屬郡聖曰後進生何知乃欲亂人治皆無所決武使從事廉得其罪聖懼自免後復爲博士

揚雄字子雲蜀郡成都人少而好學不爲章句訓詁通而已博覽無所不見爲人簡易佚蕩口吃不能劇談默而好深湛之思清靜無爲少耆欲不汲汲於富貴不戚戚於貧賤不修廉隅以微名當世家產不過十金乏儋石之儲晏如也自有大度非聖哲之書不好也非其義雖富貴不事也顧嘗好辭賦先是蜀司馬相如作賦甚弘麗溫雅雄心壯之每作賦常擬之以爲式又怪屈原文過相如至不容作離騷自投江而死悲其文讀之未嘗不流涕也以爲君子得時則大行

不得時則龍蛇遇不遇命也何必湛身哉乃作書往往撫離騷文而反之自岷山投諸江流以弔屈原名曰反離騷又旁離騷作重一篇名曰廣騷又旁惜誦以下至懷沙一卷名曰畔牢愁孝成帝時客有薦雄文似相如者召雄待詔承明之庭正月從帝甘泉還奏甘泉賦其三月祭后土還上河東賦十二月羽獵雄從上校獵賦明年秋帝大誇胡人以多禽獸使農不得收斂雄從至長楊射熊館還上長楊賦既而雄以爲賦者將以風也必推類而言極麗靡之辭閎侈鉅衍競於使人不能加也既乃歸之於正然覽者已過矣往時武帝好神仙相如上大人賦欲以風帝反縹縹有陵雲之志由是言之賦勸而不止明矣又頗似俳優淳于髡優孟之徒非法度所存賢人君子詩賦之正也於是輟不復爲而大譚思渾天參摹而四分之極於八十一旁則三摹九据極之七百二十九贊亦自然之道也故觀易者見其卦而名之觀元者數其畫而定之元首四重者非卦也數也其用

自天元推一晝一夜陰陽數度律歷之紀九九大運與天終始故元三方九州二十七部八十一家二百四十三表七百二十九贊分爲三卷曰一二三與泰初歷相應亦有顓頊之歷焉擬之以三策關之以休咎紘之以象類播之以人事文之以五行擬之以道德仁義禮知無主無名要合五經苟非其事文不虛生爲其泰曼漚而不可知故有首衝錯測攤瑩數文捫圖告十一篇皆以解剝元體離散其文章句尙不存焉哀帝時丁傅董賢用事諸附離之者或起家至二千石時雄方草太元有以自守泊如也或嘲雄以元尙白而雄解之號曰解嘲客有難元文太深者雄又解之號曰解難雄見諸子各以其知舛馳大氏詆訾聖人卽爲怪迂析辯詭辭以撓世事雖小辯終破大道而惑眾使溺於所聞而不自知其非也及太史公記六國歷楚漢訖麟止不與聖人同是非頗謬於經故人時有問雄者常用法應之誤以爲十三卷象論語號曰法言初雄年四十餘自蜀來至游京

師大司馬車騎將軍王音奇其文雅召以爲門下史薦雄待詔歲餘奏羽獵賦除爲郎給事黃門與王莽並哀帝之初又與董賢同官當成哀平閒莽賢皆爲三公權傾人主所薦莫不拔擢而雄三世不徙官及莽篡位以耆老久次轉爲大夫其恬於勢利乃如是王莽旣以符命自立卽位之後欲絕其原以神前事而甄豐子尋劉歆子棻復獻之莽誅豐父子投棻四裔辭所連及便收不請時雄校書天祿閣上治獄使者來欲收雄雄恐不能自免乃從閣上自投下幾死莽聞之曰雄素不與事何故在此閒問其故乃劉棻嘗從雄學作奇字雄不知情有詔勿問然京師爲之語曰惟寂寞自投閣爰清靜作符命蓋以雄解嘲之言譏之也雄以病免復召爲大夫家素貧嗜酒人希至其門時有好事者載酒餞從遊學而鉅鹿侯芭常從雄居受其太元法言焉劉歆亦嘗觀之謂雄曰空自苦今學者有祿利然尙不能明易又如元何吾恐後人用覆瓿也雄笑而不應年七十一卒

鄭眾字仲師河南開封人父興建武六年徵拜大中大夫九年監征南積弩營坐事左轉蓮勺令好古學尤明左氏周官長於歷數自杜林桓譚衛宏之屬莫不斟酌焉世言左氏者多祖興眾年十二從父受左氏春秋精力於學明三統歷作春秋難記條例兼通易詩知名於世建武中皇太子及山陽王荆因虎賁中郎將梁松以繒帛聘請眾欲爲通義引籍出入殿中眾謂松曰太子儲君無外交之義漢有舊防藩王不宜私通賓客遂辭不受松復風以長者意不可違眾曰犯禁觸罪不如守正而死太子及荆聞而奇之亦不强也及梁氏敗賓客多坐之惟眾不染於辭永平初辟司空府以明經給事中再遷越騎司馬復畱給事中是時北匈奴遣使求和親八年明帝遣眾持節使匈奴眾至北庭虜欲令拜眾不爲屈單于大怒圍守閉之不與水火欲脅服眾眾拔刀自誓單于恐而止乃更發使隨眾還京師朝議欲復遣使報之眾諫不可帝不從復遣眾眾因上言臣前奉使不

爲匈奴拜單于恚恨故遣兵圍臣今復銜命必見陵折臣誠不忍持
大漢節對氈裘獨拜如令匈奴遂能服臣將有損大漢之強帝不聽
衆不得已既行在路連上書固爭之詔切責衆追還繫廷尉會赦歸
家其後帝見匈奴來者問衆與單于爭禮之狀皆言匈奴中傳衆意
氣壯勇雖蘇武不過乃復召爲軍司馬使與虎賁中郎將馬廖擊車
師至燉煌拜爲中郎將使護西域會匈奴脅車師圍戊己校尉衆發
兵救之遷武威太守謹修邊備虜不敢犯遷左馮翊政有名迹建初
六年代鄧彪爲大司農是時章帝議復鹽鐵官衆諫以爲不可詔數
切責至被奏劾衆執之不移帝不從在位以清正稱其後受詔作春
秋刪十九篇八年卒於官時賈逵亦自傳其父業故有鄭賈之學
賈逵字景伯扶風平陵人誼九世孫也父徽從劉歆受左氏春秋兼
習國語周官又受古文尙書於塗惲學毛詩於謝曼卿作左氏條例
二十一篇逵悉傳父業以大夏侯尙書教授雖爲古學兼通五家穀

梁之說自爲兒童常在大學不通人間事身長八尺二寸諸儒爲之
語曰問事不休賈長頭性愷悌多智思儼有大節尤明左氏傳國
語爲之解詁五十一篇永平中上疏獻之明帝重其書寫藏祕館時
有神雀集宮殿官府冠羽有五彩色帝異之以問臨邑侯劉復復不
能對薦逵博物多識帝乃召見逵問之對曰昔武王終父之業驚驚
在岐宣帝威懷戎狄神雀仍集此胡降之徵也帝勅蘭臺給筆札使
作神雀頌拜爲郎與班固並校祕書應對左右章帝立降意儒術特
好古文尙書左氏傳建初元年詔逵入講北宮白虎觀南宮雲臺帝
善逵說使發左氏傳大義長於公穀者逵於是具條奏之曰臣謹擿
出左氏三十事尤著明者斯皆君臣之正義父子之紀綱其餘同公
羊者什有七八或文簡小異無害大體至如祭仲紀季伍子胥叔術
之屬左氏義深於君父公羊多任於權變其相殊絕固已甚遠而冤
抑積久莫肯分明臣以永平中上言左氏與圖讖合者先帝不遺

堯省納臣言寫其傳詰藏之祕書建平中侍中劉歆欲立左氏不先
暴論大義而輕移太常恃其義長詆誣諸儒諸儒內懷不服相與排
之孝哀皇帝重逆眾心故出歆爲河內太守從是攻擊左氏遂爲重
讐至光武皇帝奮獨見之明興立左氏穀梁會二家先師不曉圖讖
故令中道而廢凡所以存先王之道者要在安上理民也今左氏崇
君父卑臣子強幹弱枝勸善戒惡至明至切至直至順且三代異物
損益隨時故先帝博觀異家各有所採易有施孟復立梁邱尙書歐
陽復有大小夏侯今三傳之異亦猶是也又五經家皆無以證圖讖
明劉氏爲堯後者而左氏獨有明文五經家皆言顓頊代黃帝而堯
不得爲火德左氏以爲少昊代黃帝卽圖讖所謂帝宣也如令堯不
得爲火則漢不得爲赤其所發明補益實多陛下通天然之明建大
聖之本改元正歷垂萬世則是以麟鳳百數嘉瑞雜遝猶朝夕恪勤
游情六藝研幾綜微靡不審覈若復留意廢學以廣聖見庶幾無所

遺失矣書奏帝嘉之賜布五百疋衣一襲令逵自選公羊嚴顏諸生
高才二十人教以左氏與簡紙經傳各一通逵母常有疾帝欲加賜
以校書例多特以錢二十萬使潁陽侯馬防與之謂防曰賈逵母病
此子無人事於外屢空則從孤竹之子於首陽山矣逵數爲帝言古
文尙書與經傳爾雅詁訓相應詔令撰歐陽大小夏侯尙書古文同
異逵集爲三卷帝善之復令撰齊魯韓詩與毛詩同異并作周官解
故逵逵爲衛士令八年乃詔諸儒各選高才生受左氏穀梁春秋古
文尙書毛詩由是四經遂行於世皆拜逵所選弟子及門生爲千乘
王國郎朝夕受業黃門署學者皆欣欣羨慕焉和帝卽位永元三年
以逵爲左中郎將八年復爲侍中領騎都尉內備帷幄兼領祕書近
署甚見信用逵薦東萊司馬均陳國汝郁帝卽徵之並蒙優禮逵所
著經傳義詁及論難百餘萬言又作詩頌誄書連珠酒令凡九篇學
者宗之後世稱爲通儒然不修小節當世以此頗譏焉故不至大官

永元十三年卒時年七十二

馬融字季長扶風茂陵人美辭貌有俊才從京兆犖恂遊學博通經籍恂奇其才以女妻之永初二年大將軍鄧騭聞融名召爲舍人非其好也遂不應命客於涼州武都漢陽界中會羌虜起邊方擾亂米穀踊貴自關以西道殣相望融旣飢困乃悔而歎息謂其友人曰古人有言左手據天下之圖右手刎其喉愚夫不爲所以然者生貴於天下也今以曲俗咫尺之羞滅無貴之軀殆非老莊所謂也故往應騭召四年拜爲校書郎中詣東觀校祕書是時鄧太后臨朝騭兄弟輔政而俗儒世士以爲文德可興武功宜廢遂寢蒐狩之禮息戰陣之法故猾賊縱橫乘此無備融乃感激以爲文武之道聖賢不墜五才之用無或可廢元初二年初上廣成頌以諷諫頌奏忤鄧氏滯於東觀十年不得調因兄子喪自劾歸太后聞之怒謂融羞薄詔除欲仕州郡遂令禁錮之太后崩安帝親政召還郎署復在講部出爲河

聞王廐長史時車駕東巡岱宗融上東巡頌帝奇其文召拜郎中及北鄉侯卽位融移病去爲郡功曹陽嘉二年詔舉敦樸城門校尉岑起舉融徵詣公車對策拜議郎大將軍梁商表爲從事中郎轉武都太守時西羌反叛融上疏乞自效朝廷不能用又因星變陳北狄西戎將起宜備二方尋而隴西羌反烏桓寇上郡皆如融言三遷桓帝時爲南郡太守先是融有事忤大將軍梁冀旨冀諷有司奏融在郡貪濁免官髡徙朔方自刺不死得赦還復拜議郎重在東觀著述以病去官融才高博洽爲世通儒教養諸生常有千數涿郡盧植北海鄭康成皆其徒也善鼓琴好吹笛達生任性不拘儒者之節居宇器服多存侈飾常坐高堂施絳紗帳前授生徒後列女樂弟子以次相傳鮮有入其室者常欲訓左氏春秋及見賈逵鄭眾注乃曰賈君精而不博鄭君博而不精旣精旣博吾何加焉但著三傳異同說注孝經論語詩易三禮尙書列女傳老子淮南子離騷所著賦頌碑誄書

記表奏七言琴歌對策遺令凡二十一篇初融懲於鄧氏不敢復違忤勢家遂爲梁冀章奏李固又作大將軍西第頌以此頗爲正直所羞年八十八延熹九年卒於家

盧植字子幹涿郡涿人身長八尺二寸音聲如鐘通古今學好研精而不守章句少事馬融融多列女媚歌舞於前植侍講積年未嘗轉眄融以是敬之學終辭歸闔門教授性剛毅有大節常懷濟世志不好辭賦能飲酒一石時皇后父大將軍竇武援立靈帝初秉機政朝議欲加封爵植雖布衣以武素有名譽乃獻書以規之武不能用州郡數命植皆不就建寧中徵爲博士乃始起焉熹平四年九江蠻反四府選植才兼文武拜九江太守蠻寇賓服以疾去官作尙書章句三禮解詁時始立太學石經以正五經文字植乃上書曰臣少從通儒故南郡太守馬融受古學頗知今之禮記特多回冗臣前以周禮諸經發起紕繆敢率愚淺爲之解詁而家乏無力供繕寫上願得將

能書生二人共詣東觀就官財糧專心研精合尚書章句考禮記失
得庶裁定聖典刊正碑文古文科斗近於爲實而厭抑流俗降在小
學中興以來通儒達士班固賈逵鄭興父子並敦悅之合毛詩左傳
周禮各有傳記其與春秋共相表裏宜置博士爲立學官以助後來
以廣聖意會南夷反叛以植嘗在九江有恩信拜爲廬江太守植深
達政宜務存清靜弘大體而已歲餘復徵拜議郎與諫議大夫馬日
禪議郎蔡邕楊彪韓說等並在東觀校中書五經記傳補續漢記帝
以非急務轉爲侍中遷尚書光和元年有日食之異植上封事陳消
禦災凶八事一曰用良二曰原禁三曰禦癘四曰備寇五曰修禮六
曰遵堯七曰御下八曰散利帝不省中平元年黃巾賊起四府舉植
拜北中郎將持節以護烏桓中郎將宗員副將北軍五校士發天下
諸郡兵征之連戰破賊帥張角斬獲萬餘人角等走保廣宗植築圍
鑿塹造作雲梯垂當拔之帝遣小黃門左豐詣軍觀賊形勢或勸植

以賂送豐植不肯豐還言於帝曰廣宗賊易破耳盧中郎固壘息軍以待天誅帝遂檻車徵植減死罪一等及車騎將軍皇甫嵩討平黃巾盛稱植行師方略嵩皆資用規謀濟成其功以其年復爲尙書帝崩大將軍何進謀誅中官乃召并州牧董卓以懼太后植知卓凶悍難制必生後患固止之進不從及卓至果陵虐朝廷乃大會百官於朝堂議欲廢立羣僚無敢言植獨抗議不同卓怒罷會將誅植植素善蔡邕邕時見親於卓往請植事又議郎彭伯諫卓曰盧尙書海內大儒人之望也今先害天下震怖卓乃止但免植官而已植以老病求歸懼不免禍乃詭道從轅轅出卓果使人追之到懷不及遂隱於山谷不交人事冀州牧袁紹請爲軍師初平三年卒臨困勅其子儉葬於土穴不用棺槨附體單帛而已所著碑誄表記凡六篇

何休字邵公任城樊人父豹少府休爲人質樸訥口而雅有心思精研六經世儒無及者以列卿子詔拜郎中非其好也辭病而去不仕

州郡進退必以禮太傅陳蕃辟之與參政事蕃敗休坐廢錮乃作春秋公羊解詁覃思不窺門十有七年又註訓孝經論語風角七分皆經緯典謨不與守文同說又以春秋駁漢事六百餘條妙得公羊本意休善歷筭與其師博士羊弼追述李育意以難二傳作公羊墨守左氏膏肓穀梁廢疾黨禁解又辟司徒羣公表休道術深明宜侍唯幄倖臣不悅之乃拜議郎屢陳忠言再遷諫議大夫年五十四光和五年卒

服虔字子慎初名重又名祗後改爲虔河南滎陽人少以清苦建志入太學受業有雅才善著文論作春秋左氏傳解又以左傳駁何休之所駁漢事六十條舉孝廉稍遷中平末拜九江太守免遭亂行客病卒所著賦碑誄書記連珠九憤凡十餘篇

魏

王肅字子雍東海郡人年十八從宋忠讀太元而更爲之解黃初中

爲散騎黃門侍郎太和二年父蘭陵侯朗卒肅嗣封三年拜散騎常侍四年大司馬曹真伐蜀以霖雨山阪峻滑衆逼而不展糧運難繼真發踰月而行裁半谷肅上疏諫罷又上疏宜遵舊禮爲大臣發哀薦果宗廟事皆施行又上疏陳政本青龍中山陽公薨肅上疏曰昔唐禪虞虞禪夏皆終三年之喪然後踐天子之位是以帝號無虧君禮猶存今山陽公承順天命允答民望進禪大魏退處賓位公之奉魏不敢不盡節魏之待公優崇而不臣及至其薨櫬斂之制輿徒之飾皆同於王者是故遠近歸仁以爲盛美且漢總帝王之號號曰皇帝有別稱帝無別稱皇則皇是其差輕者也故當高祖之時土無二王其父見在而使稱皇明非二王之嫌也况今以贈終可使稱皇以配其諡明帝不從使稱皇帝乃追諡曰漢孝獻皇帝後肅以常侍領祕書監兼崇文觀祭酒景初閒宮室盛美民失農業期信不敦刑殺倉卒肅上疏論諫又陳諸鳥獸無用之物而有芻穀人徒之費皆可

竊除帝嘗問曰漢桓帝時白馬令李雲上書言帝者諦也是帝欲不
諦當何得不死肅對曰但爲言失逆順之節原其本意皆欲盡心念
存補國且帝者之威過於雷霆殺一匹夫無異螻蟻寬而宥之可以
示容受切言廣德宇於天下故臣以爲殺之未必爲是也帝又問司
馬遷以受刑之故內懷隱切著史記非貶孝武令人切齒對曰司馬
記事不虛美不隱惡劉向揚雄服其善敘事有良史之才謂之實錄
漢武帝聞其述史記取孝景及己本紀覽之於是大怒削而投之於
今此兩紀有錄無書後遭李陵事遂下遷獄室此爲隱切在孝武而
不在於史遷也正始元年出爲廣平太守公車徵還拜議郎頃之爲
侍中遷太常時大將軍曹爽專權任用何晏鄧颺等肅與太尉蔣濟
司農桓範論及時政肅正色曰此輩卽引恭石顯之屬復稱說邪爽
聞之戒何晏等曰當共慎之公卿已比諸君前世惡人矣坐宗廟事
免後爲光祿勳時有二魚長尺集於武庫之屋有司以爲吉祥肅曰

魚生於淵而亢於屋介鱗之屬失其所也邊將其殆有棄甲之變乎其後果有東關之敗徙爲河南尹嘉平六年持節兼太常奉法駕迎高貴鄉公於元城是歲白氣經天大將軍司馬昭問其故肅對曰此蚩尤之旗也東南其有亂乎君若修己以安百姓則天下樂安者歸德唱亂者先亡矣明年春鎮東將軍毋邱儉揚州刺史文欽反昭謂肅曰霍光感夏侯勝之言始重儒學之士良有以也安國寧主其術焉在肅曰昔關羽率荊州之衆降于禁於漢濱遂有北向爭天下之志後孫權襲其將士家屬羽士衆一旦瓦解今淮南將士父母妻子皆在內州但急往禦衛使不得前必有關羽土崩之勢矣昭從之遂破儉欽後遷中領軍加散騎常侍甘露元年卒門生縵經者百數追贈衛將軍謚曰景侯初肅善賈馬之學而不好鄭氏采會同異爲尚書詩論語三禮左氏解及撰定父朗所作易傳皆列於學官其所論駁郊祀宗廟喪紀輕重凡百餘篇

王弼字輔嗣山陽人父業爲尚書郎弼幼而察惠年十餘好老氏通辯能言未弱冠往造吏部郎裴徽徽一見而異之問弼曰夫無者誠萬物之所資也然聖人莫肯致言而老子申之無已者何弼曰聖人體無無又不可以訓故不說也老子是有者也故恒言無所不足尋亦爲傳嘏所知於時何晏爲吏部尚書甚奇弼歎之曰仲尼稱後生可畏若斯人者可與言天人之際乎正始中黃門侍郎累缺晏旣用賈充裴秀朱整又議用弼時丁謐與晏爭衡致高邑王黎於曹爽爽用黎於是以弼補臺郎初除覲爽請閒爽爲屏左右而弼與論道移時無所他及爽以此嗤之時爽專朝政黨與共相進用弼通僑不治名高黎尋病亡爽用王沈代黎弼遂不得在門下晏爲之歎恨弼在臺旣淺事功亦雅非所長益不留意焉注易及老子弼性和理樂遊宴解音律善投壺天才卓出頗以所長笑人故時爲士君子所疾與鍾會善會論議以校練爲家然每服弼之高致何晏以爲聖人無喜

怒哀樂其論甚精鍾會述之弼與不同以爲聖人茂於人者神明也同於人者五情也神明茂故能體冲和以通無五情同故不能無哀樂以應物然則聖人之情應物而無累於物者也今以其無累便謂不復應物失之多矣弼爲人淺而不識物情初與王黎及潁州荀融善黎奪其黃門郎於是恨黎與融亦不終正始十年曹爽廢以公事免其秋遇厲疾亡年二十四司馬師爲之嗟嘆者累日

晉

杜預字元凱京兆杜陵人智謀淵博明於理亂常稱德者非可以企及立功立言所庶幾也魏甘露二年起家拜尚書郎襲祖畿豐樂亭侯爵在職四年轉參相府軍事鍾會伐蜀以預爲鎮西長史及會反寮佐並遇害惟預以智獲免與車騎將軍賈充等定律令旣成預爲之注解乃奏之曰法者蓋繩墨之斷例非窮理盡性之書也故文約而例直聽省而禁簡例直易見禁簡難犯易見則人知所避難犯則

幾於刑厝刑厝之本在於簡直詔班於天下晉泰始中守河南尹預以京師王化之始自近及遠凡所施論務存大體受詔爲黜陟之課司隸校尉石鑒以宿憾奏預免職時虜寇隴右以預爲安西軍司給兵三百人騎百匹到長安更除秦州刺史領東羌校尉輕車將軍假節屬虜兵強盛石鑒時爲安西將軍使預出兵擊之預以虜乘勝馬肥而官軍懸乏宜并力大運須春進討陳五不可四不須鑒大怒復奏預擅飾城門官舍稽乏軍興遣御史監車徵詣廷尉預尙文帝妹高陵公主在八議以侯賸論其後隴右之事卒如預策是時朝廷皆以預明於籌略會匈奴帥劉猛舉兵反自并州西及河東平陽詔預以散侯定計省闢俄拜度支尙書預乃奏立藉田建安邊論處軍國之要又作人排新器典常平倉定穀價較鹽運制課調內以利國外以救邊者五十餘條皆納焉石鑒自軍還論功不實爲預所糾遂相讐恨言論誼譁並坐免官以侯兼本職數年復拜度支尙書元皇后

梓宮將遷峻陽陵舊制既葬帝及羣臣卽吉尙書奏皇太子亦宜釋服預議皇太子宜復古典以諒闇終制從之預以時歷差舛不應暑度奏上二元乾度歷行之又以孟津渡險有覆沒之患請建河橋於富平津議者以爲殷周所都歷聖賢而不作者必不可立故也預曰造舟爲梁則河橋之謂也及橋成武帝從百寮臨會舉觴屬預曰非君此橋不立也周廟敲器至漢東京猶在御坐漢末喪亂不復存形制遂絕預創意造成奏上之帝嘉歎焉咸寧四年秋大霖雨蝗蟲起預上疏多陳農要預在內七年損益萬機不可勝數朝野稱美號曰杜武庫言其無所不有也時帝密有平吳之計而朝議多違惟預羊祜張華與帝意合祜病舉預自代因以本官假節行平東將軍領征南軍司馬及祜卒拜鎮南大將軍都督荊州諸軍事預旣至鎮繕甲兵耀威武乃簡精銳襲吳西陵督張政大破之政吳之名將也據要害之地恥以無備取敗不以所喪之實告於其主預欲閒吳邊將使

於大軍臨至將帥移易以成傾蕩之勢乃表還其所獲之眾與吳吳主皓果召政遣武昌監劉憲代之預處分既定乃啓請伐吳之期帝報待明年方欲大舉預累表陳至計言自秋以來討賊之形頗露若今中止孫皓怖而生計或徙都武昌更完修江南諸城遠其居人城不可攻野無所掠積大船於夏口則明年之計或無所及張華亦贊成其計帝乃許之預以太康元年正月陳兵於江陵遣參軍樊顯尹林鄧圭襄陽太守周奇等率眾循江西上授以節度旬日之間累尅城邑皆如預策又遣牙門管定周旨伍巢等率奇兵八百泛舟夜渡以襲樂鄉多張旗幟起火巴山出於要害之地以奪賊心吳都督孫歆震恐與伍延書曰北來諸軍乃飛渡江也吳之男女降者萬餘口旨巢等伏兵樂鄉城外歆遣軍出距王濬大敗而還旨等發伏兵隨歆軍而入歆不覺直至帳下虜歆而還故軍中爲之謠曰以計代戰一當萬於是進逼江陵尅之既平上流於是沅湘以南至於交廣吳

之州郡皆望風歸命奉送印綬預仗節稱詔而綏撫之又因兵威徙將士屯戍之家以實江北南郡故地各樹之長吏荆土肅然吳人赴之如歸矣時眾軍會議或曰百年之寇未可盡剋今向暑水潦方降疾疫將起宜俟來冬更爲大舉預曰昔樂毅藉濟西一戰以并強齊今兵威已振譬如破竹數節之後皆迎刃而解無復著手處也遂指授羣帥徑進秣陵所過城邑莫不束手吳旣平振旅凱入以功進爵當陽縣侯封一子亭侯賜絹八千疋初攻江陵吳人知預病瘵憚其智計以瓠繫狗頸示之每大樹似瘵輒斫使白題曰杜預頸及城平盡捕殺之預旣還鎮累陳家世史職武非其功請退不許預以天下雖安忘戰必危勤於講武修立泮宮江漢懷德化被萬里攻破山夷錯置屯營分據要害之地以固維持之勢又修邵信臣遺跡激湮渚諸水浸原田萬餘頃分疆刊石使有定分公私同利眾庶賴之號曰杜父舊水道惟沔漢達江陵千數百里北無通路又巴邱湖沅湘之

會表裏山川實爲險固荆蠻之所恃也預乃開楊口起夏水達巴陵千餘里內瀉長江之險外通零桂之漕南土歌之曰後世無叛由杜翁孰識智名與勇功預公家之事知無不爲凡所興造必考度始終鮮有敗事或譏其意碎者預曰禹稷之功期於濟世所庶幾也預好爲後世名常言高岸爲谷深谷爲陵刻石爲二碑紀其勲績一沉萬山之下立峴山之上曰焉知此後不爲陵谷乎預身不跨馬射不穿札而每任大事輒居將率之列結交接物恭而有禮問無所隱誨人不倦敏於事而慎於言旣立功之後從容無他事乃耽思經籍謂公羊穀梁詭辯之言先儒說左氏未究邱明意而橫以二傳亂之乃錯綜微言著春秋左氏經傳集解又參考衆家譜第謂之釋例又作盟會圖春秋長歷備成一家之學比老乃成又撰女記贊當時論者謂預文義質直世人未之重惟祕書監摯虞賞之曰左邱明本爲春秋作傳而左傳遂自孤行釋例本爲傳設而所發明何但左傳故亦

孤行時王濟解相馬又甚愛之而和嶠頗聚斂預常稱濟有馬癖嶠有錢癖武帝聞之謂預曰卿有何癖對曰臣有左傳癖預在鎮數餉遺洛中貴要或問其故預曰吾但恐爲害不求益也卒時年六十三帝甚嗟悼追贈征南大將軍開府儀同三司諡曰成

述曰儒者之患最易好名否則立異至於勢怵利疚品斯下矣楊子雲著太元法言欲擬易象論語杜元凱慨陵谷之變遷汲汲焉惟恐不傳於後是皆好名之過然素號爲恬退者而終不免投閣之譏究不能脫然於勢利外焉荀卿當聖道衰微忽創爲性惡之說劉子政見枕中秘笈遂真謂黃金可成王輔嗣崇尚清虛何邵公注述風角探索隱怪學術遂岐若夫戴次君治郡不法馬季長不勝飢困竟附權臣王子雍尊魏則忘漢爲司馬則忘曹利勢之見生而儒行之道息矣之數人者其言行固不無可議然而覃慮研思務精其說苟舍短而取長亦未可盡以人廢言也賈景伯欲尊左傳而世主方崇識

緯遂托其說以幾左氏之得立蓋有苦心非左道亂聖者比張璪徒逞一時之論肆爲詆訶至舉無可疵議如鄭眾盧服諸人亦盡舉而廢斥之噫嘻過矣汾粗學淺識誠不足論諸儒優劣謹取前史所載者列於篇而附鄙見於後以俟後之君子至王安石父子之當黜絕山論之詳矣故其傳不載

關里文獻考卷七十二終

關里文獻考卷七十三

子孫著聞者第十五之一

吾宗自二世祖以下歷世單承至八世而始有三子曰鮒曰騰曰樹自是派別支分偉人輩出上自漢世迄於

國朝二千餘年之間或守其家學獨抱遺經或策名登朝鴻猷懋著或秉高素之操或厲忠義之節或以獨行見稱或以文章名世莫不炳炳麟麟昭在前冊使其略而弗紀甚非所以光顯前修垂訓後哲此汾家傳之所爲作也傳之體例首博士崇祀典也次族長尊齒德也次世尹學錄先世職也僊與尙任雖非世職而用漢書恩澤侯之例則亦附其後焉家學所傳莫重經術故儒林次之學優則仕用取通經故諸名臣又次之以下忠義孝友隱逸文苑則竊取史氏之義各以類書而附熙先範二人於末者使知悖亂殞宗亦所以示戒也大宗家傳已見世系故不復書至於序列不以時代而以宗派且必

著其富曾之系者則又因以寓家譜之義云爾

聞禮字知節六十一代衍聖公次子也究心天文律歷聲音制度等書明正德二年始受翰林院五經博士奉子思子中庸書院祀卒年五十九

毓埏字鍾與六十六代衍聖公次子也康熙十八年襲五經博士

賜三品階授奉議大夫年五十八卒毓埏好學而博工於著述所著有研露齋文集麗則詩集蕉露詞集皆典贍可觀初

聖祖嘉毓埏有文譽

御書遠秀二字賜之後人因序次其集總曰遠秀堂集

傳鈺字振文六十七代衍聖公次子也性通敏美丰儀能詩畫康熙四十五年襲五經博士授通議大夫

世宗臨雍入京陪祀

召見內殿

上注目良久曰孔博士風神酷類其父欲用之問博士有陞遷否傳誌以職在奉祀子思祖廟對乃止

賜六藝世家四字額著補閒集清濤詞年五十四卒

述曰右世襲五經博士自三人而外有六十三代貞寧六十五代衍桂衍植衍桂早卒衍植後襲衍聖公皆已別見世系六十九代繼溥今以疾致仕故事博士承襲以衍聖公次嫡子所以重主祀也然或無次嫡或有次嫡而已領他職則庶子及族子咸得代襲主祀事庶子代襲者有六十九代繼澍族子代襲者有六十四代尙達六十五代衍相衍錫衍隆六十七代毓麟毓瑛

彥繩字朝武先聖五十九代孫也十二世祖傳有傳傳長子端問南宋時爲奉新縣丞生壽壽漳州錄事參軍生摠摠銅陵主簿生應發應發武寧縣令生之言之言竟州府同知生津津生思許思許無子以兄思俊第三子克忠爲嗣克忠福清學正生希路希路福州岳山

書院山長生議議生公誠公誠生彥繩此明初舊譜之世次也弘治十一年彥繩改刊家譜謂已實南宗衍聖公洙之六世孫北宗駁焉勒石衢之學宮而衢州知府沈杰右之爲奏言衢州聖廟自孔洙讓爵之後衣冠禮儀猥同氓庶今訪得洙之六世孫彥繩請授以官俾主祀事又言其先世祭田洪武初輕則起科後改徵重稅請仍改輕以供祀費帝可之正德元年授彥繩翰林院五經博士子孫世襲并減其祭田之稅今襲博士者其十代孫名傳錦

承寅字永肅先聖六十代孫也二十六世祖子歎爲唐三十三代襲聖侯次子子歎子賢孫蘊皆自有傳蘊生炯炯生惟一初唐天寶之亂賢同嗣文宣公避亂寧陵後兵解文宣公歸魯惟一與文宣公之弟惟時畱寧陵守林廟生簡簡生持持生昭邈昭邈爲諫議大夫生濤濤通判南康生侮侮莒州推官生皓堅皓堅登州判官生秀正秀正宋仁宗天聖元年賜學究出身奉祀事生才實才實生休重休重

生從倫從倫爲蘊州太守生思淳思淳生彌中彌中生元銘元銘生
贊之贊之生秀元世祖時詔天下舉文學之士秀以聖裔召見授儀
封主簿秀生字忠字忠生克文自克文以上皆世居寧陵守林廟元
末兵亂克文始遷儀封猶歲往奉祀事如故至明正統間黃河圯壞
林廟英宗始詔徙於儀封克文生希賢希先希賢生立剛立剛生公
鏞公鏞生彥紀承寅彥紀子也承寅狀貌奇偉氣度豁達少補邑弟
子員既長爲林廟舉事約束宗族人人咸服嘉靖間比衢州博士彥
繩例乞予職奉祀詔以爲國子監學正世襲年七十八卒子失承替
至崇禎元年而族孫尙林始襲尙林者希先九世孫也希先生立敬
立敬生公義公義生彥信彥信生承宋承宋生宏仁宏仁生聞過聞
過生貞尤貞尤生尙林尙林補邑生員性孝友嚴於取與動止有法

崇禎元年五十五代行聖公白於朝襲學正

國朝順治七年請致仕遂以子衍齊襲今嗣學正廣遠尙林七代孫

也

述曰朝武以下諸人行實他無可考以其爲南宗博士及儀封學正
世職之始且欲明其派系故附於博士傳後

關里文獻考卷七十三終

關里文獻考卷七十四

子孫著聞者第十五之二

顓字器之先聖五十代孫高祖宗穀見國子博士彥輔傳曾祖若鼎
宗穀第五子也爲壽張令祖端修金章宗時授進義校尉不就以年
長命爲孔庭族長兼提領監修林廟事父瑋學究出身養親不仕顓
幼失怙恃勵志讀書避兵汴京流離辛苦閒猶手不釋卷左丞張琪
奇其才薦之朝授開封令金亡歸元爲濟堯單三州等處宣課提領
時兵火後祖庭殿廡俱爲灰燼顓慨然申於東平行臺嚴實實可其
請卽令顓提領監修林廟事顓勤慎廉幹克復舊制又以宗系失傳
感憤陳論獲辨正焉

元龍初名拊字伯凱亦先聖五十代孫居衢州曾祖傳有傳祖端己
傳次子也父璞宋理宗朝授迪功郎孔庭族長奉祠南岳喜讀書至
老不輟嘗謂人之誦經史猶飢渴之得飲食也自號景叢子有景叢

集十卷元龍嘗從真西山遊篤學尙志閉戶著述作誨忠策又輯洙泗言學四十餘章西山稱其以先聖之裔而研精先聖之書其所發明有補學者後上其書於朝帝嘉之授迪功郎孔庭族長後任饒州餘干簿尋歸衢教授部使者延請爲柯山精舍山長年踰九十猶手不釋卷有柯山論語講議魯樵集卒門人私謚曰文介子後以子應得貴贈少師應得官至資政殿大學士諫議大夫簽樞密院事

涇字世清先聖五十三代孫祖元敬有傳父之謹元敬第四子也善春秋三傳終深澤教諭涇初仕元爲興化路學正再授平陽路教授四方學者爭從之遊改紹興路知事入爲翰林國史院檢討明初遵例徙臨濠以五十六代衍聖公奏得放還鄉里爲孔庭族長洪武七年涇呈告世襲知縣希大諸不法狀下山東省審鞠省勘得實者數事餘涉子虛希大旣得罪涇亦坐誣刑部上讞詔皆免罪復令涇及希大面對責涇以教諭不先之過仍賜龍頭藤杖主理家政并遣御

史王昂齋勅宣諭族人俾遵約束焉山東省試兩聘分校皆稱得人
晚年續訂祖庭廣記二十卷卒年七十六子四人思楷其次子也
思楷字文道繼父爲族長奏請重修祖廟能世其職性尤好施與有
友呂博自太原來依多方周給之博死復撫其孤女鄉黨咸高其義
焉年六十二卒

詮字全伯先聖五十七代孫五世祖之熙元敬長子也爲雲夢尹高
祖洵三氏學學正東平路教授曾祖思衍盤陽路教授祖克晉世職
知縣父希幹詮兒時讀書顏子廟與羣兒嬉戲失腳墮陋巷井中家
人以繩引出詮曰井有巨蛇張口吐舌欲噬人幸未受其害然吾亦
不甚懼也時人異之及長智識超卓遇事明斷里黨有不平事詮以
數言剖析復以禮讓勸諭之人多悅服而去明宣德八年爲林廟舉
事年五十九卒

述曰族長爲舉族矜式必齒德衆著始足以樹儀型而端表率舉事

主修林廟亦非公勤廉幹者弗勝厥職也若鼎若涇若詮皆能其任
元龍以儒學著而思楷德厚亦有長者之風焉抑考自四十六代孫
宗哲於宋崇寧間始授迪功郎爲孔庭族長繼者類能舉宗範以訓
子弟而世遠年湮家傳殘缺能舉其軼事者尠矣顧可考其名者族
長則有四十七代若鑑四十八代端修四十九代瓚瑄瑤五十代持
撫五十一代元祚元裕五十二代之善五十三代潛五十四代思櫟
五十五代克晏克晏有傳克煦克勳克晟五十六代希琛希晟希迪
希瑄希瑾希瑒五十七代諾詡諤諱五十八代公寵公寧公綉公紆
公源五十九代彥乾彥鳳六十代承蛟承謨承賓六十一代宏存宏
侃宏依宏倬宏瑄六十二代聞學聞叔聞塾六十三代貞詩貞珍貞
珩舉事如道輔克伸皆自有傳端稟見世系考中餘若四十六代舜
亮四十七代若升四十九代琇五十代揮五十一代元長元灝元讓
元石元質元祗五十二代之文之容之進五十三代澄沐五十四代

思義思用思度思舉五十六代希韶希璜五十八代公錄公性公從
公源五十九代彥瀾六十代承沂承苴承流六十一代宏順宏超六
十三代貞璘貞操貞枚貞壘六十四代尙遵六十五代衍樾衍鎬衍
澈衍楨衍權衍珉六十六代興訥興濯興煥六十七代毓儀毓琰毓
宗毓銑毓碑六十八代傳望傳樞傳家備列其人使後來者得所考
證焉

關里文獻考卷七十四終